

N

VI

18/n

N. vi

18. / n









10196

# ORATIO INAUGURALIS

DE NECESSITATE

## ARTIS CHEMICAЕ

Eiusdemque Productu summo

MAGNA HOMINVM ET METALLORVM MEDICINA

# LAPIS PHILOSOPHORVM DICTA.

HABITA

IN ACADEMIAE WITTENBERGENSIS  
AUDITORIO MAIORI

D. VII. NOVEMBR. A. M DCC XXIV.

A

D. IO. THEODORO Neufranken  
AD PHARMACIAM ET CHEMIAM CONSTIT. P. P.  
MED. EXTRAORD. EIVSDEMQUE FACULT. ASSESSORE.



VITEMBERGAE

APVD VIDVAM GERDESIAM

M. DCC XXV.









# PRAELOQVIVM

I. N. I.

*A. O. O. H. &c.*

**Q**uamvis Sceptici ubique reperiantur, et nullo tempore, ex eruditis etiam defecerint, qui omnes indifferenter artes et scientias vanas haberent, ipsique Theologiae non parcerent, nulla tamen omnium, quod sciam, tam duris vanorum perverforumque ingeniorum iudiciis, tam diris eorum, qui imperitiae morbum malitia cumularunt, iniuriis et calumniis unquam est affecta, quam ars praestantissima Chemia in primis secundum partem eius principem, quae Arcanum arcanorum omnium, magnam hominum et metallorum Medicinam, s. secretum Philosophorum lapidem docet. Sed quid mirum? hic execrandus omnium seculorum fuit mos, ut ingens quoque bonum toties et anxie quaesitum, at rarissime inventum, ut rem pessimam et detestabilem odio habuerint plus quam Vatiniano; Divinum hoc DEI praepotentissimi



munus fuit abstrusum quovis tempore, et in  
abditis sapientum sacrariis, secreto detentum,  
quidve de illo scriptum a possessoribus suis,  
non nisi mysticis eloquiis, aenigmatibus, alle-  
goriis, et similitudinibus, tum ab elementis,  
tum ab elementatis, aequivocationibus, chara-  
cteribus et nominibus inusitatis, involutum ha-  
betur; hinc illae querelae et accusationes, haec  
difficultates praebent, quaerentibus, et arcant  
indignos ab opere! Soliti enim sunt, tam vetu-  
stissimi, quam recentiores Philosophi, non ex-  
ponere vulgo sua secreta; sed filiis doctrinae.  
Demus Io. Francisco Pico, *vixisse ab omni ae-  
tate vix quindecim veros adeptos*. Ponamus cum  
Andrea Libavio, *hoc nostro tempore nullum esse,  
qui possit assequi illa vetustatis miracula; tamen  
non negandum erit, tam proterve, nullam un-  
quam fuisse, aut esse posse factorum in natura vel  
arte, rationem et fidem*. Largiamur Auberto,  
Erasto, Fenetto, Scaligero, Cardano, Gviber-  
to, Athanasio Kircherro et omnibus, quotquot  
fuerint et adhuc dum inveniantur, artis ofores,  
*Chemiae nobilissimae sese adiungere speciosas quas-  
dam imposturas, ac esse aliquos, qui delira fiducia  
et inani persuasione, quasi sciant, id quod tamen  
nesciunt, et fallaces Tincturas, Sophismataque  
adultera substituant legitimis dogmatibus, impo-  
nunt*



nunt incautis non uno modo, (sex nempe et triginta eiusmodi fraudum species, ex Riceri Thraſybuli admonitione, ad calcem ſuae confessionis iam recensuit, Henricus Conradus) *at omnes decuiſſet non attendere, quid illi decoctores vulgares promitterent, quid Bragadinus effecerit? quid alii pariter Scelerati ſibi arrogaverint? ſed quid conveniret artis Principiis per ſe: uti recte monet contra Guibertum Andreas Libavius, qui et ad ceterorum argumenta ſat levia ſufficienter reſpondit, in Syrraxi ſua Metallica altera.* Athanaſio Kirchero non minus ſatisfecit Salomo de Blawenſtein. Quam ob rem ſupervacaneum duco, apud malevolentes arti diutius morari; inprimis cum plurimi poenitentia criminis, contra divinam Chemiam eiusque cultores commiſſi, ducti, ſobrius poſtea philoſophati ſint. Morofis autem adhuc Verba Henrici Conradi oppono, quibus fig. 3. admirandae diligentiae Amphitheatri uſus eſt, et ita ſe habent: *Lapis Philoſophorum eſt: Hunc nempe rerum experientia, omnium etiam ſola ſufficiens Magiſtra infallibiliter atteſtatur: cui refragari, nonne eſſet plus quam ſtultum? Hunc (ab aliis tamen praeparatum) virtuoſe efficacem vidit, et Pontifex Romanus et Caefarea Maieſtas. Viderunt et Reges orbis Terrarum non pauci.* Nec



non Imperii Romani Electores nonnulli. Viderunt et Principes aliquot, Comites, Barones, Nobiles et propter virtutem et doctrinam a Nobilibus proximi Doctores: imo ex omni gente Iudaea, Ethnica et Christiana, statuque ac ordine passim, multi, tam Ecclesiastici, quam Politici, Literati pariter ac illiterati, oculis (obstupefcentes naturae per artem miraculi) viderunt, manibusque tetigerunt suis, sciens loquor. Huc usque Conradus. Propero nunc ad propositum meum, quod est, more atque instituto maiorum, Orationem meam inauguralem, de *Necessitate Chemiae eiusque productu summo, magna hominum ac Metallorum Medicina, Lapis Philosophorum dicta*, pronunciare atque munus Professoris, clementissime mihi collatum, capeffere. Antequam vero illud peragere aggrediar, prius ad Vos A. O. O. H. me converto, submisse perhumaniterque rogans, atque contendens, Velitis omnia, quae, pro instituti ratione, prolaturus sum, benevole audire et aequibonique consulere!

ORA-



ORATIO INAUGVRALIS  
DE  
NECESSITATE  
ARTIS CHEMICAЕ  
EIVSDEMQUE PRODVCTV  
SVMMO, MAGNA HOMINVM AC  
METALLORVM MEDICINA, LA-  
PIS PHILOSOPHORVM  
DICTA.

---



rtis Chemicæ iam potiti excultæ,  
de derivatione vocis Chymiaæ,  
Chimiaæ ac Chemiaæ, non multum  
simus solliciti, cum, qualis vox sit,  
utrum Graeca, an Arabica, Aegy-  
ptiaque, nondum constet, et quæ  
de eius notatione, apud Autores  
observantur, merae sint coniectu-  
rae, ne quidem de literis, quibus Aegyptiï, in anti-  
quissimis temporibus usi sint, aliquid certi probantes:  
Graecia vetus hoc vocabulum certe nescit, nemo Le-  
xicographorum eius fecit mentionem: Plus autorita-  
tis habent, qui, ab Arabica radice Chama *exarsit*, ca-  
lore *examinavit*, vocem derivare amant. *Floruit nem-  
pe ars in Arabia, et probabilius prius, quam apud Graecos,*  
*unde et Al, articuli additione Alchemia usitatissime audit, et*  
*hinc Chimia potius, quam Chymia, quod Arabes y carent, vel*  
*Che-*



*Chemia scribitur.* (α) Neque longe morabor, tempus ortus invenire, aut Inventores Chemiae ab Adamo usque enumerare. Placet tamen, quae de eius antiquitate, ortu et successu felici, inter scriptores veteres ac modernos nota sunt indubitata argumenta, paucis attingere. Antequam vero hoc fiat, sciant oportet A. O. O. H. me Chemiam habere artem peculiarem, a nulla alia arte aut scientia dependentem, vel partem solum cuiusdam constituentem, sed per se omnium excellentissimam, ac ipsam Philosophiam operativam, cuius culturam Baconus de Verulamio (β) omnibus *ingeniis*, rerum naturae scrutatoribus, tantopere commendat, et quae veris naturae principiis et fundamentis innixa, sub debito operationum directorio, ipsa corporum naturalium mixtorum et compositorum penetralia aggreditur, eademque in partes, ex quibus naturaliter construuntur, resolvit, quas purificatas, alteratas et exaltatas artifice iterum miscet et coniungit; atque hac ratione naturae arcana, aut supra nos immensum sublata, aut infra nos alte abscondita perscrutatur, totique generi humano multifariam inservit: aut enim ad maximum metamorphoseos metallorum opus, ipsamque arcanam Lapidis Philosophorum praeparationem, permittente id divino Numine, ducendo, aut Physicae scientiae, ad explicationem rerum naturalium perspicatorem multa occulta aperiendo, vel arti Medicae medicamenta utilia suggerendo, vel denique Metallurgis, maiore cum fructu in mineris laborandi modum et

---

(α) Georg. Wolffg. Wedel introd. in Alchim. p. 15. seq. Salmuth. in not. ad Pancir. Tit. VII. de Alchemia Lib. 2. p. m. 137.

(β) *In visis et cogitatis.*



et media monstrando; ut taceam iam immensos, quos in Mechanicis et Oeconomicis habet usus, ita ut non immerito quis dicat: Nullam esse artem, nullamque scientiam, quae non ex Chemia augmenta capiat.

Haec vero ars praestantissima, primam suam originem, procul dubio debet Metallurgiae, quam antiquissimi esse ortus, praeclarum testimonium sacrae literae nobis praebent, quando a Spiritu Sancto Gen. IV. v. 22. innuitur, Tubalcainum fuisse Magistrum in omni opere aeris et ferri. Et quamvis post Plinium, multi cum Polydor. Vergilio (γ) opinentur, quod ex hoc loco nihil amplius sit iudicandum, quam Tubalcainum scivisse, qua ratione metalla ad agri culturam, et alios, in vita communi, usus, cudi et adhiberi debeant; Tamen recte cum Senn. nostro (δ) concludimus: *Si cudere aes et ferrum monstravit, necessum est, ut prius, qua ratione investigari, coqui, fundi, segregari et purificari possit, docuerit, vel ab aliis didicerit. Et si ferro et aere laborare noverat, procul dubio et reliqua metalla ipsi non fuere incognita.* Insignem itaque Tubalcainus Metallurgiae habuit notitiam, quam absque dubio Posterius eius magis magisque excoluerunt; a quibus autem ante diluvium hoc factum sit, certo non constat. Post diluvium vero a Chamaeis et Nimrodaeis, ex Chaldea et Babilonia, in eisdem Chamaeorum (Mizraimi scilicet) imperio parentem Aegyptum Ars sine dubio pervenit, et ibidem ab Hermete Trismegisto, Noachi auditore, Chusi, Chami filii, Praeceptore et Scriba, (quem Aegyptiis, Abrahae temporibus, praefuisse, iis leges, et literas tradidisse, artisque magni Magisterii exercitio, patriam admirabilem et celeberrimam reddidisse

B

---

(γ) Lib. 2. c. 19. de Rerum Invent.

(δ) Lib. de Chemic. Consens. et dissens. Cap. 3. p. 19.



didisse, ex Heurn. refert Thomas Reinesius, (ε) unanimi omnium Chemicorum consensu in multis aucta est. Exinde non minus Colchidis metallorum feracis Reges eandem acquisiverunt, et patrimonio avito illatam possederunt. (ξ) Argonautae vero invidia avaritia ne, an cupiditate scientiarum, duce Iafone, aureum Vellus, tantopere a Poëtis decantatum, quod Suidas librum fuisse scribit, ὅπως δὲ γινέσθῃ Διὰ χημείας χερσόν, una cum custode eius Medea rapuerunt: Cuius fabulae explicationem et applicationem ad magnum Chemicorum opus dedit curiosissimam Senn. (η) ex qua vel sola liquet, quam profundam notitiam, etiam secretioris Chemiae, Autor habuerit. Omnes insuper fabulas Graecas de operationibus naturae, in lapidis Philosophici praeparatione, adaequatam suscipere interpretationem, probare conatur, Valer. Bonvicinus. (θ) Quid vero praefatus Trismegistus s. Mercurius in Chemia praestiterit, praeter Tabulam istam famosam smaragdinam, et libros quosdam, qui graece Hermetis nomine circumferuntur, nullum habemus vestigium. Interea tamen certum manet, quod Chemia in Aegypto, ceu reliquarum etiam Artium et Scientiarum praecipuarum fonte, si non nata sit, tamen incrementa sumserit.

Animadvertentes enim, Metallurgiae cultores indefessi, aurum inter reliqua metalla esse nobilissimum, spem ignobilia in id transmutandi, conceperunt, huiusque gratia circa metalla et mineralia, multa tentata sunt, variae institutae operationes, separationes nempe, resolutiones, combinationes atque destillationes

---

(ε) *Chimiatria* p. 18. 19.

(ξ) *Thom. Reines. L. c. p. 20.*

(η) *Lib. c. p. 24.*

(θ) *Lance Peripat. p. 178.*



nes, hasque deinde etiam applicando vegetabilibus ac animalibus, via, non solum Medicamenta artificiosius praeparandi, aperta est, ut recte iudicat Sennertus noster (i) sed plura alia detecta sunt naturae arcana.

Quod et ipsos nobiliores Graeciae sapientiae et virtutis Magistros, ut Democritum, Thaletem, Anaxagoram, Socratem, Pythagoram, Platonem aliosque sine dubio commovit, in Aegyptum proficisci. (κ)

Unde etiam non immerito quis iudicaret, hos commemoratos Philosophos, artis doctrinam, in Patriam transtulisse, testari etiam satis fragmenta et ἀνέκδοτα inducti Democriti Abderitae et Zosimi, aliorumque in Bibliothecis quibusdam reperiunda, Graecos post Aegyptios, primos Chemiam coluisse; malunt tamen plurimi Autores, Arabibus, hac in re, Palmam deferre, *licet ex illorum familia, ante Gebrum, neminem habeamus, qui Chemiam definiverit, suisque organis actionibus, materia et effectibus locupletaverit* (λ).

Post Christum natum, et sub imperio Diocletiani, Chemiam in primis iuxta eius partem transmutatoriam, five Chrysopoeiam ab Aegyptiis adhuc strenue exercitam fuisse, hosque hac arte magnas divitias sibi comparasse, inde patet, quod iste Imperator omnes libros, de auri ex aliis metallis conficiendi ratione, conscriptos, conquirendos et comburendos iusserit, ne amplius Romanis, ut modo duce Achilleo fecerant, repugnarent, prout ex Svida praeter Senn. refert Panciroll. (μ) et Salmuth in notis.

B 2

De

---

(i) L. c. Cap. 1. p. 2.

(κ) Cicer 5. de finibus Bon et Mal. p. m. 1049. et 4. Tuscul. Quest. p. 1091. Philostrat, in Vita Apollonii Lib. 1.

(λ) Salmuth. ex Tb. Musetto L. c. p. 143.

(μ) Lib. 2. Tit. VII. p. 141. seq.



De altera autem eiusdem parte, quae Medicamenta utilia arti medicae suggerit, inter Medicos altum tunc erat silentium. Tempore nempe belli Troiani Chirurgia magis excolebatur, et eius nomine tota veniebat Medicina. Quousque tandem Avicennas Vir magni ingenii, circa A. Ch. 1000. omnem Chemiam, una cum Medicina, quasi in tenebris latentem, adiutus Bibliotheca Regia incomparabili, iterum in lucem protraxit et excoluit, eiusque ope, in exercitio artis Medicae, multa curationum miracula edidit, de quo plura vid. ap. Massam in vita Avic. Quem deinde multi sunt secuti Arabes, et Mauri, ut Rhafis, Artephius, Alphidius, Ioannes Mesues, Abdelae Damasci Regis abnepos. Hic nempe cum Sect. 12. Antid. in Tit. de oleis, alia per expressionem, alia per impressionem, alia per resolutionem, quando virtute caloris disgregantur, fieri notasset, addit, *plurigena esse in concreto occulta, et de his consulendos esse Alchemistas, quorum sit disgregatio.*

Harum nationum Philosophi quidam sine dubio Anno Christi DCCC XII. cum Saracenorum copiis paulatim Hispaniae infusi, una hanc artem suam, etiam per Europam, varie disseminarunt; Unde apparet, antiquorum dictorum Chemicorum farraginem, quae Turba Philosophorum audit, maximam partem ex illorum sententiis, atque aliis quibusdam latinis Graecisque adiunctis, conflata esse, et in nostram Medicinam, Pharmaceuticam, et Chemiam multa irrepsisse vocabula barbara.

Tempore post, cum et Graecorum scripta explicarentur, non defuerunt etiam in Europa plurimum seculorum et Nationum Viri sapientes, qui magna cum dexteritate et laboribus indefessis, Veterum scripta Chemica conquifiverunt, examinarunt, obscura, quan-



quantum per artem licitum fuit, illustrarunt, pugnantia conciliarunt, falsa exploderunt, atque vera et sana in artis ambitum receperunt. Quorum libri partim manuscripti, partim impressi, et vario idiomate versi, adhuc dum habentur, ut Rogerii Baconis, Arnoldi Villonovani, Raimundi Lullii, Petri boni Lombardi, Basilii Valentini, Ioannis de Rupefissae, Georgii Ripley, Isaaci Hollandi, Bernhardi Trevisani, aliorumque. Illos, qui vult in ordine recensitos, videat apud Andream Libav. in defens. utraque Alchymiae contra Gvibert. Borrichium in conspectu Chemicorum, Georg. Agricolam Dedicat. ad Lib. 12. de re Metall. Ludou. Combachium Praef. ad Georgii Ripley opera, ubi insuper singularem historiam Raimundi Lullii vitam et mortem concernentem, refert ex relatione itineris Persici Ann. 1628. a Patre Pacifico absoluti, Parisiis Ann. 1631. impressa.

Ex his omnibus et pluribus aliis apud nominatos Autores reperiundis argumentis firmissimis, satis superque constare credo; artem nostram nobilissimam non nuper inventam, aut a Sophistis excogitatam, sed antiquissimam et veracissimam esse; Quanquam etiam non video, cur vitio arti quis vertat, aut eandem propterea vilipendat, si ad instar plurimarum aliarum novissimae esset inventionis: sat nempe antiqua, si sat vera, et sufficit, nos illam possidere excultam, atque fructibus eius uti uberrimis.

Cum autem Autores Chemicis diversas habeant hypothèses, et in tradenda arte, non unum eundemque servant genium, sed plurimi parabolice, aenigmatice, mythologice, aut per signa varia et characteres, suam sententiam exprimant, licet in tertio quodam, omnes genuini conveniant, horum selectum et notiti-



am sibi comparare, nec omnes indifferenter sequi oportet. De quo prae aliis vid. Wolffg. Wed. Introd. in Alchim. p. 17. seq.

Non minus optime notandum, scriptores Chemicos antiquos fere omnes, Medios, et ante Paracelsum plurimos, post eum etiam non paucos, in suis tam multis, tamque diverse conscriptis libris, unam eandemque tractare materiam, nimirum maximum naturae et artis mysterium, sive secretissimam Tincturae aurificae et argentificae elaborationem, quam, quia naturae legibus optime conformis, et de stupendis eius effectibus, in opere transmutationis metallorum, innumera prostant exempla, non amplius in dubium vocamus. Haec vero videantur passim apud Hoffmann. Clave Pharm. p. 207. M. Mich. Neandrum Rect. Schol. Ilfeld. in sua orb. Terr. descript. fol. 56. Valer Bonvicin. Lanc. Perip. p. 163. Beccher. Phys. subt. Supplementis, Oedippo Chémico, Metallurg. p. 286. Io. Wolffg. Dienheim. Universal-Arzney Cap. 24. Balduin Aur. Aurae p. m. 152. 153. Herm. Lather de Cens. L. III. C. II. ex Cardan. Durand. etc. Tiling. Prodr. Prax. Chimiatri. p. 47. Matth. Untzer. Anat. Mercurii Spagyr. Lib. I. Cap. 17. Vigilant. de Monte Cubiti Dedicat. am dreyfachen Hermetischen Klee-  
blat/ Camerar. Memorab. Med. Cap. 5. p. m. 79. Lachmund. de Ave Diomed. p. 16. Stierkium in Praefat supra Irenaeum Philal. Ipsum Irenaeum im Kern der Alchimie, Freyherrn von Schrotenbach Tr. von Goldmachen/ Wunder drey/ Berlich. Disp. de Med. Univ. Sperling. Disp. de Arsenico, A. Brandau. Universal Tinctur. item Blavensteinium, Boyleum, Morhoff. Reschium ex Hogelando, Philalet. Zwoelff. Ephem. germ. Helv. vit. aur. Clau. Helm. Borrich. Kunckel. Horn. Praefat.  
in



in Gebr. Pancirolli. et alios innumeros. Novissimum et certissimum est a Boettichero Berolini factum experimentum, in praesentia heri sui Zornii, et duorum Pastorum hospitum, cuius etiam mentionem fecit Wolffg. Wed. Lib. cit. p. 14. Ipsemet vidi et manibus meis trivi frustulum auri sat grave, quod a Beato Boettigero, praesente viro quodam fide digno, ex Mercurio communi paratum fuerat Dresdae.

Inique etiam agunt, et maximam inferunt iniuriam huic naturae et artis superlativo, qui vires, in curandis pluribus corporis nostri infirmitatibus, et vita prolonganda, ipsi derogare conantur, rationes enim, quas ad stabiliendam sententiam adferunt, plane sunt insufficientes, minime illius praestantiae praeiudicant et prorsus nihil summae eius virtuti et efficaciae adimunt. Reducuntur autem ad has tres praecipuas.

I. Morbos ex innumeris et multo diversis oriri causis, consequenter eosdem non posse tolli uno eodemque remedio.

II. Lapidis Philosophorum materiam, genuinorum Chemicorum consensu, desumi ex regno minerali, et non nisi in eius naturae familia metalla, ignis adiumento, agere posse, a quibus autem corpora nostra toto coelo non solum differant, sed modus etiam agendi, ipsis sit prorsus inapplicabilis.

III. Deum nobis praefixisse certum vitae tempus, quod prolongari nulla re posset.

At ut paucis ad easdem respondeam, multitudinem et differentiam causarum morbificantium iam non negabo,



bo, perpendant modo paulo accuratius velim cum aliis intimioris earum naturae scrutatoribus, omnes easdem, quo duplices, et quam diversae etiam sint, ad sanitatis laesionem proxime concurrere, qua fluidum nostrum vitale varie turbant, et in hoc in primis partes salino sulphureas balsamicas qualitatibus suis heterogeniis et naturae molestis inquinant, unde pro indole praeternaturali diversa, crasis, et motus eius varie alteratur, vires simul naturales prosteruntur, in summa harmonia ista amicabilis, quae in mixtione et motu convenienti partium fluidarum, atque structura legitima solidarum unice consistit, et sanitas in specie dicitur, labefactatur. Hinc porro universalem oriri indicationem, omne heterogeneousum et sanitati inimicum tollendum, atque vires, quae a motu partium vivido dependent, suffulciendas esse, cui sane nullum adaequatius respondet indicatum, praeter maximum hoc naturae et artis magisterium, cuius in fixitate sua penetrabilitas, mobilitas, atque in mundificando, et viribus exaltandis excellentia, reliqua medicamina omnia multis parasangis antecellit.

Quodsi vero ulterius quis obiiceret, hoc, quod iam dictum est, valere quidem posse de morbis internis, et in specie humoralibus, minime autem extendendum esse ad morbos partium solidarum et affectus externos, e. g. luxationes, fracturas etc. hic in tantum me habebit consentientem, in quantum morbi isti non ab humorum vitiis duxerunt ortum, aut revera a manu Chirurgica et externis v. g. Ligamentis, fasciis, emplastris aliisque topicis, suam expectent atque accipiant medelam, quanquam et in hoc casu, eius usus non erit irritus et frustraneus, cum etiam mediate, sanguinem et reliquos humores ad motum vividum incitando, atque hac ratione accidentia varia, tumores, dolores,



lores, inflammationes et gangraenam arcendo, restitutionem, coalitionem, atque consolidationem maturare possit.

Secundum quod concernit Argumentum, in hoc licet veri Artistae omnes conveniant, quod illius magnae medicinae materia vera profapiae sit mineralis, quicquid etiam alii eruditi alias satis, ab elementis aut elementatis ex regno vegetabili et animali in contrarium frustra vel semper speraverint; tamen ubi tanta differentia et quod dicunt, toto coelo, inter mixtionis materiam corporis animalis et mineralis a sanioribus minimum Philosophis concessa sit, sane nescio, quin potius ab excellentissimo Stahlio, et Wedelio expresse asseratur (v) regna inter se esse symbolica et communicare invicem, seu participare etiam vegetabilia et animalia de particulis terreis, et quasi mineralibus exemplo tartari et calculorum; item constare non minus vegetabilia et animalia principiis mineralis et subterraneae indolis, atque absolvi ab iisdem etiam horum regnorum mixtiones. Et si vel maxime rationes in locis allegatis uberrime datas impugnare quis audeat, experientiae, utpote omnium rerum magistrae, minime refragabitur, qua certissime patet, gravissimos morbos curatos esse et adhuc dum curari mineralibus et metallicis remediis e. g.  $\delta$ ialibus,  $\xi$ ialibus,  $\theta$ ialibus etc. quando autem tam egregios praestant effectus, vel ruditer praeparata, quidni ab illis optime purificatis, intime reclusis, exaltatis atque ad summam fixitatem et perfectionem reductis, erit sperandum, non etiam est quod opinemur, divinam hanc Medicinam ad operandum in nostro corpore, tanto ignis et caloris

C

gra-

---

(v) *Specim. Beccher. p. 43. seq. Introd. in Alchim. p. 32. seq.*



gradu, ac in metallis opus habere, cum hunc, non respectu sui, sed metalli fundendi, aut candendi, priusquam in id agere posset, requirat, Tinctura enim per se summae est activitatis et facillimae liquationis, quod etiam pro vero eius criterio habent Philosophi, (E) ut iam taceam, posse non minus metalla aut metallica, menstruo suo soluta, per praecipitationem exaltari.

Tertium, salva nostra, de universali quadam Medicina, sententia, firmiter stabit, modo per certum vitae tempus nobis praefixum intelligatur, terminus a Deo positus, necessitate conditionata, ab hominum pietate vel impietate, Diaeta, aliisque causis secundis et contingentibus dependens; dedit nempe sapientissimus Deus hominibus rationem, et liberum reliquit arbitrium, quibus quando decenter utimur, et vitae nostrae normam inde emendamus, magnae huius Medicinae energia tamdiu vivimus, quamdiu per nostram complexionem seu dispositionem corpoream nobis est concessum, mortemque non evitamus, sed eandem tolerabili in statu, cum vegeta sanitate expectamus, praesentes nempe morbos exturbat et ab absentibus praeservat corpora nostra, de quibus pluribus vid. Clauderus L. c. minime vero credendum, optimum Deum ex absoluto decreto inevitabili, cuilibet hominum, certum morbi genus definivisse, quo perire cogatur; et certam horam praedestinasse, quam anticipare aut prolongare, simpliciter sit impossibile, quin potius per multa testimonia in sacris literis constet, ipsum, pro sua singulari clementia, aliquando vitam ad plures annos extendisse, aliquando vero impiis, ex poena, dies abbreviasse, vel propria hominum quoque culpa, mortem



tem maturare permisisse. Sic per Eſaiam cap. 38. v. 5. iuſſu omnipotentisſimi ad Hiſkiam Regem laeta fit annuntiatio: *Audiui orationem tuam, et vidi lachrymas tuas: et adiiciam ad dies tuos quindecim annos.* Et Proverb. 3. v. 1. 2. dicitur, *Fili mi, legis meae ne oblivifcaris, et praecepta mea cuſtodiant cor tuum; quia longitudinem dierum et annos vitae, et pacem apponent tibi:* porro Cap. 10. v. 27. *Timor Iehovae apponit dies: et anni impiorum abbreviantur:* item Exod. 23. v. 25. 26. *Si coletis Iehovam Deum veſtrum: numerum dierum veſtrorum complebo;* contra vero Pfalm. 55. v. 24. *Viri ſanguinariiii et doſoſi non dimidiabunt dies ſuos:* et 73. v. 19. *Quam ſubito deficiunt iniqui? pereunt, et eorum finis eſt horribilis.* Item Eccleſiaſt. 7. v. 18. *Ne impie agas multa, et noli eſſe ſtultus, ne moriaris in Tempore non Tuo etc.* de quibus tamen plura vid. apud Theologos et inprimis Calovium, Huſſemannum, Hunnium alioſque.

Sufficit, quod iubeamur medicamentis uti a ſacro Codice, et per longam indubitataque experientiam quoque certum conſtet, remedia tam omnia, quam in ſpecie ſecretiſſimam hanc metallorum et hominum Medicinam nunquam fruſtra, nunquam inutiliter, ſed maximo ſemper et mirando cum ſucceſſu aegrotantibus adhibitam fuiſſe, ut eius teſtimonia innumera ſunt videre apud allegatos Autores Chemicos.

Verum enim vero, licet hoc magnum Dei donum, in natura et arte, certo fundatum credere, ratio et experientia ſuadeat, ipſique ob maximae virtutis et efficaciae excellentiam, (utpote primario artis ſcopo et vero fini, inter reliqua Chemiae producta praecipuus locus merito aſſignari debeat, nemo tamen putet velim, acquisitionem eius tam facilem, et quosvis univerſalia cre-



pantes pro veris arcani huius possessoribus haberi, quin  
potius vel semper teneamus, illud miro artificio, alto-  
que silentio, perpetuo absconditum fuisse, Deumque  
maximum et hic, uti magnam virtutem, etiam ma-  
gnam difficultatem collocasse, atque opus sua manu  
tegere, non nisi ab ipso solo petendum ac impetran-  
dum. De quibus in singulari libro vid. Theobaldus  
ab Hoghelande. Senn. L. c. p. 13. Salmuth. L. c. p. 148.  
sequent. et Io. Aurelius Augurellus in Chrysopoeia.  
Propterea etiam nemini autor ero et suafor, ut solius  
huius artificii causa, (quod fugit quaerentes, nec nisi  
occasione discitur, recte loquente Becch. in Praefat. ad  
Physicam suam subterraneam) studium Chemicum ag-  
grediatur, *quibus vero cordi est, in finem veritatis,  
artem tractare, et in eruendis arcanis naturae  
profundissimis, in Maiestatis divinae operibus ab-  
ditis et inexhaustis, ingenium exercere, iis forsan  
et huius divini operis scientia minimum, quae et-  
iam iucunda est, non prorsus incognita manebit,*  
ad quam inprimis lucem accendunt Autores sequentes  
Geber Arabs in Chemia, Suchtenius, Pantaleonis scri-  
pta, Berlich. disp. de Med. universali, Bernhardus, Bec-  
cherus, Annon. Arcanum hermeticae Philosophiae  
opus, Philaletha Introit. aperto, Metamorphos. me-  
tall. cum reliquis duobus Irenaei s. Rhomaei, Medul-  
la Alchimiae, it. Enarrat. in Med. Gebri, Experiment.  
circa Mercurium Philosophor. et breve manu ducto-  
rium ad campum Sophiae, Aquila Thuring. rediviv.  
Refutat. Tumbae Semiramidis, Epist. Ripley ad Edu-  
ardum Regem, Canon. de Lap. Philosoph. Sucht. Io.  
de Monte Snyder. Metamorphosis planetar. et eius-  
dem



dem Tract. de Med. Univ. Sed claudo de hocce  
Thesauro tractationem, voto B. Wolffg. Wed. in Prae-  
fat. ad Alchim. *Optandum foret, ut magnates,  
quorum bona pars penetrarunt intimius admissi,  
in haec sacraria, et de tali honestissima societate  
instituenda cogitarent, vel saltem faverent ma-  
iori gratia genuinis artis filiis, securi sic futuri, a  
fraudibus non inescandi ad frustraneos et immen-  
sos sumtus, demerituri summe universam rem pu-  
blicam medicam et literariam.*

Cum autem, ut supra innui, non omnibus liceat adire  
Corinthus et paucis admodum concessum sit, ad ab-  
sconditissimi huius magisterii possessionem pervenire,  
ars ditissima Chemia in hoc solo omnes eius divitias con-  
clusas noluit, sed praeter universalem hunc omnis salutis  
temporariae fontem, rivulos inde fluentes in particulari-  
bus nobis monstravit quam plurimos, quorum tracta-  
tio sobria etiam non de nihilo erit. Per experimenta  
nempe circa metalla ignobilia accuratius instituta,  
iam antiquissimis Artistis perspectum fuit, in illis non  
minus Aurum et argentum potentia minimum recon-  
ditum esse, quod certo operationum directorio et ad-  
ditis rebus competentibus, in via tam sicca quam hu-  
mida, ita figi et maturari possit, ut etiam non raro  
bona pars ignobilioris metalli una, in suae naturae simi-  
le aurum et argentum commutetur. de quibus pluribus  
vid. Author. praef.

Placuit etiam nonnullis Chemicis, ut B.  
Wolff. Wed. et Becchero, has quoque *ἐγχειρίσεις*  
ad particularia referre, mediantibus quibus particulae  
subtilissimae sive micae actu quidem aureae et argen-  
teae, sed per impuriore et ignobiliores minerarum et



metallorum partes, tantum nimis diffusae et dispersae,  
Menstruis aut additamentis idoneis, et adhibito simul  
igne fusionis colliguntur et ad oculum sistuntur.  
Quae tamen potius ad partem separatoriam s. Me-  
tallurgiam rationalem pertinere videntur. Quinempe  
et hic, secundum vera naturae et artis fundamenta pro-  
cedit, facile cognoscet, qualia sint, quae ingrediantur  
mineralia atque metalla, illaque componant, quamve  
hae partes constitutivae inter se habeant analogiam aut  
discrepantiam, ac quod mineralia omnia, metalla et  
metallica, non nisi proportionem mixtionis, compo-  
sitionis, aut aggregationis, inter se differant, atque in  
huius mineralis compositione aut aggregatione hoc,  
in alio, aliud praevaleat recrementum: Ex quibus o-  
mnibus porro colliget, quomodo in fusione minerali-  
um ad metalla elicienda, per additamenta debita, mul-  
tum utilitatis afferre possit, et quod metallurgi, ex eo-  
dem fundamento, mineralibus fundendis, cum fructu  
varia adiiciant; quibus partes metallicaе a spoliantibus  
sic dictis recrementis metallicis, conserventur, licet  
huius rei rationem reddere non valeant, in qua tamen  
re maiora operum pretia facienda esse, ille optime vi-  
det, qui semel atque iterum ipse expertus est, mine-  
ralia plus metalli in se continere, et saniori methodo  
tractata, uberiores etiam eius proventus revera lar-  
giri; quam quidem a metallurgis, vulgari modo proce-  
dendi, ex iisdem acquiritur; in minori quantitate hanc  
rem plus vice simplici habemus expertam, maiori pe-  
riculum facere, hactenus defecit occasio, quo minus  
vero et hic dubitem, svadent aliorum successus felices.  
Vid. Becch. Physic. subterranean. Supplem. et Metall. Stahl.  
Metallurg. Unde luculentissime patet, ad hos quoque la-  
bo-



bores Chemiam multum posse, qui, ut utiliter tractentur, Principis et Patriae multum interest.

Non vero mineralia tantum intimius perscrutatur Chemia nostra rationalis, sed omnia, quae in toto hoc universo sub sensus cadunt, corpora ipsi sunt subiecta; eorum omnium causae, affectiones et proprietates verae, si-ve a mixtione si-ve compositione aut aggregatione illorum dependentes, ex principiis, per artem hanc nobilissimam, demonstrabilibus evidentissime patent, non etiam sola cognitione corporum naturalium est contenta, sed revera ex illis aliquid efficit, quod naturae soli efficere est impossibile, et unde innumera in totum genus humanum fluxere bona. Qua re certe nulla alia Philosophia, neque Aristotelis, Platonis, Pythagorae, Empetoclis, Heracliti, Anaxagorae, Democriti, Parmenidis, Xenophantis, aut aliorum gloriari potest. De quibus recte loquitur Baconus de Verulamio in visis suis & cogitatis: Ex tot Philosophiis per tot annorum spatia elaboratis, ne unum quidem experimentum adduci posse, quod ad hominum statum levandum, aut locupletandum spectet, et huiusmodi speculationibus vere acceptum referri possit. Quin contra Aristotelis de quatuor elementis commentum, cui ipse potius auctoritatem, quam principium dedit, (quod avide a Medicis acceptum, quatuor complexionum, quatuor humorum, & quatuor primarum qualitatum coniugationes post se traxit) tanquam malignum aliquod & infaustum fidus, infinitam & Medicinae, nec non compluribus mechanicis rebus, sterilitatem attulisse, dum homines per eiusmodi concinnitates, & compendiosas ineptias sibi satis fieri patientes, nihil amplius curant: Quaestionum interea et controversiarum turbas circa huiusmodi Philosophias undique

que



que sonare et volitare; adeo ut fabula illa, de Scylla, in eas ad vivum competere videatur, quae virginis os et vultum extulit, ad uterum vero monstra latrantia succingebantur, et adhaerebant: Ita habere et istas doctrinas quaedam primo adspectu speciosa, sed cum ad partes generationis ventum est, ut fructum ex se edant, tum nihil praeter lites et inquietas disputationes inveniri, qui partus vices obtineant, et Helmontius ait in Tract. Pharmacop. et Dispensator. moderno, §. 32. *Chemia principia habet non longissimis parta, sed quae per naturam sunt cognita, et per ignem conspicua, praeparatque intellectum ad penetranda naturae occulta, ponitque vestigationem in natura ulteriorem, quam aliae scientiae omnes.* Quis autem ex his non videt, quantam etiam lucem rerum naturalium explanationi seu Physicae scientiae suffundat ocularis Chemia, imo quis negabit? ipsam esse Physices firmissimam basin, dicit enim Bacon. l. c. in naturali Philosophia requiri, ut scientia ex operibus monstretur: Item in natura opera veritatis pignora esse. Veritatem enim per operum indicationem magis, quam ex argumentis, aut etiam ex sensu, et patefieri et probari. Idem illustris Baconus, in novo organo scientiarum pergit: *Illam ratio est optima, quae debitis modis elicitur ex rebus, et vocatur naturae interpretatio, quae verior efficitur per instantias et naturae experimenta idonea et apposita, et Raimundus Lullius Testam. cap. 26. Ut cunque Logicus inquit: habeat profundum ingenium argumentabile, aut naturale, de rebus extrinsecis, tamen nunquam per aliquam rationem, quae venit ad sensum poterit directe cognoscere, nec iudicare, quomodo semen in terra pullulet, crescat, & colligat fructus: nisi cum doctrina experimentalis prius intraverit, in nostram Philosophiam naturalem, et non sophisticam sermocinalem illam, quae nascitur logicis, per diversas praesumptiones phan-*  
tasti-



*rafficas etc.* hucusque Lullius. Chemia rationalis certo sola, veluti splendidissima Dianae lampas, abdita naturae penetralia illustrat et claustra reserat, per huius nempe operationes et experimenta, saniori methodo instituta, perfecta demum datur inspectio, in minutiores et minus obvias rerum naturalium partes, ex qua eorum mixtio et collatio, ad se invicem, omnesque inde fluentes proprietates, manifestantur, nemo sane in Physicis contemplationibus, et naturae perscrutationibus, sine hac excellere potest.

Quemadmodum autem Chemia, occultos ac intimos naturae recessus aperit, ita talia quoque producit ex regno vegetabili, animali et minerali, medicamenta, quae contumacissimis et gigantacis etiam morbis resistere valeant; absque huius studii nobilissimi notitia, ars Pharmaceutica non minus quam tota Medicina profecto langueret. Hodierna nostra ipsius splendore unice radiat, et ex operationibus et experimentis Chemicis quotidie acquirit accessiones, quod nempe habet optimorum, efficacissimorum et gratissimorum medicamentorum, id Chemiae soli acceptum debet. Haec docuit corpora medicamentosa omnis generis recludere, purum ab impuro, utile ab inutili, subtile a crasso separare, hoc cum competentibus iterum componere, compositique vires praeparationibus variis intendere et exaltare, imo ex ipsis venenissimam et in minima dosi summarum virium medicinam concinnare, quae etiam in desperatissimis morbis saluberrimum praestat effectum, quibus iam mirum quantum differt a veterum illa Pharmacia, unde non nisi electuaria, apozematum pocula et syrupi, ad descriptionem nescio, quot pedes longam laboriose

D

con-



confecti, tamen taediosissimi et multo inferioris virtutis petebantur; Qualia Pharmaca in hodierno vivendi statu perversissimo et excessibus Diaetae maximis, minime sane sufficerent; quam ob rem ex sapientissimo consilio et singulari gratia, qua Deus optimus maximus super merita semper prospexit generi humano, factum esse, certo mihi persuasum habeo, quod hoc tempore etiam, quo studia, spissa barbarie obruta, omnia latebant, Artem Chemicam nihilominus vel in monasteriis, maxima cum industria, semper exercitam fuisse, testantur de hoc scripta Raimundi Lullii, Isaaci Hollandi, Rogerii, Basilii Valentini, Io. de Rupe-scissae aliorumque, quorum multa nondum edita, in magnis Bibliothecis manuscripta servantur. Habuit inde etiam sine dubio cuncta, quae mirificis involucribus involvit, et perversè satis atque corrupte divulgavit Theophrastus Paracelsus. Legit plurima ipse in manuscripto, a Monacho, longe ante Paracelsum exarato, et testatus est Io. Crato a Krafft-heim in epistola ad Iosephum Scaligerum Lib. XV. de subtilitate Iul. Caesar. Scaligeri praeposita. Quid autem publice privatimque utilius, quam mortalitati nostrae, quantum quidem licet, subvenire, morbos corporis nostri arcere et depellere, et languentem proximum atque iacentem restituere? Minima certe Medicina, quae certo morbum aliquem curat, praestantior est omni auro atque gemmis, talem vero non unam suggerit Chemia.

Ut autem de utilitate eius in inveniendis ad sanitatem amissam restaurandam tutissimis, iucundissimis et efficacissimis Medicamentis iam plura non dicam, nemini non optime notum est. Artis quoque operationibus in perficien-  
dis



dis alimentis, quibus ad vitam sustentandam utimur, nos carere minime posse, sic, ut terra proferat frumenta, olera, uvas et arborum fructus omnis generis, opus est eius cultura, fimatione, pampinatione et similibus, per insertionem furculorum et inoculationem, fructus evadunt delicatiores. Hordeum, per se coctum, non praebet cerevisiam, nisi primo ignis calore torreatur, et in polentam mutetur; ex uvis non fit mustum et vinum, nisi torculando, succum separando et fermentando; ad panem conficiendum necesse est, ut massa fermentetur et coquatur; esculenta, varie condiendo et coquendo, nobis paramus fercula grata. Vinum a fecibus abstrahendo, in dolia reponendo, sulphure perfumando, vel in vinositate conservamus, vel in acetum et spiritum ardentem mutamus, et sic porro; ita ut hic appriue satis dixerit Beccherus, Naturam incipere, Artem autem perficere et naturae perpetuo quasi obstetricari. Et quis porro omnia beneficia, ad hominum usum, ab Arte Chemica largiter iam pro fluxa, satis enumerare potest? Quot sunt quaevis artes mechanicae, quot opificia, quae non Chemiae multum debent? nullum sane quod circa subiecta fossilia aut metallica corpora operatur huius ope vacare potest. Per Chemiam posidemus Docimasticam, artem destillatoriam, vitrariam, tinctoriam, saponariam, haec docuit Encausticen, et omnis generis colores in arte pictoria utiles, Chalcographicam et Chartae praeparationem, quorum ope in tantum vestigium evectae sunt literae, item pulverem pyreum et acum nauticam, quae duo inventa, infinitae in re bellica et navali, in toto terrarum orbe, mutationes secutae sunt, pluraque alia curiosissima aperuit secreta, quae paucis sunt



cognita; nuper admodum artem hanc nobilissimam tractantibus modus innotuit, et in nostris regionibus porcellanam efficere, ipsa Chinensi pulchritudine non modo inferiorem, sed in pluribus praestantior. Atque nullum profecto est dubium, latere adhuc in natura multa per artem hanc nobilissimam educenda, modo saniori methodo tractetur, quam hucusque factum est, et non ab una parte sectatores eius avaritia detestabili vitio impulsii, statim aurum affectent, et incertis fundamentis totum tempus circa lapidem Philosophorum inveniendum consumant, librosque eorum, qui Aureos montes, et nescio quid amplius, promittunt, lubentius legant, et processus inibi contentos vanos in praxin reducant, quam verorum Philosophorum scripta, quae rerum principia vera, earundemque generationis, corruptionis, solutionis et coagulationis praecepta et fundamenta tradunt. Ab altera autem parte, Chemiam qui docent, eandem ad Medicinam totam relegant, et non nisi qua Medicamenta utilia suggerit, solis Medicinae studiosis necessariam putent, contra vero praecipuum scopum, qui ad metallorum et minerarum dextram tractationem, maturationem et separationem, aliaque humano generi producenda utilia tendit, super habeant; Cum tamen nemini eruditorum, si quidem solidam eruditionem venientur, idque per alias occupationes liceat, ignorandum sit; si quid aliud enim, sane Alchemia, facit ad *πολυματίαν* et literaturam, ornat eruditos omnes, recte sic pronunciante Wolffg. Wedelio. (o)

Quod optime etiam advertens Potentissimus Poloniarum REX et ELECTOR SAXONIAE, Dominus

---

(o) *Introd. in Alchimiam Cap. I. §. 5. 6.*



nus noster Clementissimus, pro maxima, qua fulget inter Monarchas sapientia, et singulari, in omnia studia bona, propensione, Artem hanc praestantissimam in Alma hac eruditorum celeberrima, iam ex instituto doceri praecepit, et mihi praeter meritum hanc spartam clementissime demandavit, de hac gratia MAIESTATI REGIAE, devotissimas, submississimas habeo et ago grates. Servet semper saluum sospitemque omnipotentissimum Numen, fartum et tectum ab omnibus calamitatibus REGEM nostrum Clementissimum cum universa domo REGIA et ELECTORALI, quo, sub eius auspiciis, haec nostra Academia perpetuo splendeat, et ego mandato eius clementissimo, in cunctis, et ut voveo, omnibus animi et corporis viribus, satis facere, atque securus ab impedimenti quibusvis propositum meum ad *Ακμήν* perducere valeam. Vobis denique A. O. O. H. etc.

Agite nunc omnes Philosophiae operativae amantes, praestate mihi manus auxiliatrices, Laboratorium Chemicum in aedibus meis invenietis exstructum, instrumenta ad quasvis Artis operationes aptissima, cum sola Philosophia experimentalis s. Chemia rationali, cuius facies hodierna est splendidissima, auspicato naturae arcana intrabimus, Artem exordiemur ab hoc, quo originem duxit primam, tractabimus primo Mineralium, Metallicorum et Metallorum doctrinam, ubi non solum de qualitatibus eorundem externis erimus solliciti, sed Boyleum, Beccherum, Wedelium et Stahlianum excellentissimum sequentes, intimam subterraneorum mixtionem aggrediemur, hinc nobis patebunt qualitates internae, earundem causae, differentiae et vicissitudines, dispiciemus, qualem ad se invicem in mixtione et compositione habeant collationem, progredie-



diemur, porro ad vegetabilia et animalia, atque horum quoque mixtorum contemplabimur principia vera, iisdem quoque ipsis competentes operationes instituemus, veniemus inde ad intimam Pyrotechniae, Halotechniae et Zymotechniae rationalis notitiam, quae quasi claves ad penetralia Philosophiae experimentalis porrigit, hanc qui bene habet cognitam, de oblato processu, sive labore Chemico statim iudicabit a priori, et ex ingredientium natura atque modo procedendi, qualis sit sperandus successus, et si difficultas quaedam subsit, qua ratione et quibus enchyrisibus haec tollenda, imo ipse non solum ex proprio ingenio et experientia processus veros, genuinos et naturae congruos instituere, sed etiam aliorum producta ad examen vocare poterit. Dictum Vitembergae,

D. VII. NOVEMBR. A. M  
DCC XXIV.

















